





**S**treiherr v. Ende-Siljessnitz.

X. 21

Q. B. IV V.

DE

# PRÆJUDICIIS,

Sub

PRÆSIDIO

M. ANDREÆ Töpffers /

FAC. PHIL. ADJ.

publice differet

CHRISTIANUS ANDREÆ,

Hala-Saxo,

*In Auditorio Majori,*

*Ad D. 14. Mart. 1696.*

H. C.



VITÆMBERGAE.

Ex FORMIS CHRISTIANI SCHRÖDTERI, ACAD. Tre.

VIRIS

*Nobilissimo, Amplissimo, Excellentissimo, Consultissimoq<sup>z</sup>*  
DOMINO

**D.JOH.CHRISTOPHORO Herolden/**  
Jcto Celeberrimo, Hæreditario in Reideburg / Se-  
renissimo ac Potentissimo Electori Brandenburgico a Con-  
siliis Aulicis & Regentibus eminentissimis.

Nec non

*Summe Reverendo, Magnifico, Nobilissimo atque Excellentissimo*  
DOMINO

**JOH. CHRISTIANO OLEARIO,**  
SS.Theol.D. celeberrimo, Serenissimi ac Potentissi-  
mi Elect. Brand. Inspector Circuli Salani vigilantissimo, Con-  
sistorii Ecclesiastici Assessori gravissimo , Ecclesiæ ad B.  
Virg. Pastori Primario meritissimo,

*Dominis Patronis ac Promotoribus omni venerationis  
& obsequii genere obnixe semper colendis,*

Hoc Exercitium Academicum  
in gratissimi & observantissimi  
animi signum  
*D.*

**RESPONDENS.**



**N**on parum damni afferre studiis diversarum  
multorum hominum ingenia, neminem  
veritatis amantem inficiaturum fore arbi-  
tror. Multi enim, cum eruditionis inopia  
laborent & tamen gloriam captent ac emergere cupi-  
ant, in eo toti occupati sunt, ut aliorum gloriæ detra-  
hant, & in aliis carpendis terant tempus, meliori desti-  
nandum negotio. Evidem si æq; facile esset, magna &  
egregia præstare quam omittere, tot invidiæ mancipia  
vix se offerrent. Verum cum arduum ac difficile sit ma-  
gna moliri & propria virtute inclarescere, multa homi-  
num pars criminari libentius & carpendo obscurare  
solet, quæ consequi se posse desperat. Præter hos dantur  
alii, quos neq; ingenium quidem nec eruditio plane de-  
stituit, ut via ipsis ad honores ac gloriæ gradum imper-  
via haud sit; sed dum nimium sibi tribuunt, aliosq; pa-  
res perferre ægre patiuntur, quasi monopolium sapi-  
entiæ sibi solis reservetur, contemnunt reliquos, & sic  
toti literato orbi inutiles evadunt. Alii aliis laborant vi-  
tiis, quæ & in vulgus nota sunt, & sic satius prætereun-  
tur. Ex hac autem ingeniorum diversitate tot conten-  
tiones, disceptationes, rixæ & turbæ oriuntur, quæ o-  
mnem dissentium ardorem sufflaminant, Musarum  
quietem evertunt, & studiis innocentibus odium ac ru-  
inam conciliant. Singuli autem se probe rem curasse  
putant, dummodo obtineant, quod volunt; sive de cæ-  
tero cum commodo sive detimento, cum jure vel in-  
juria labores sint conjuncti. Hoc negari nequit, eam ho-  
minum conditionem esse, ut facile labantur; unde &

A 2

cœlo

cœlo digna nomina quandoque cum Homero dormitarunt. Neque illud a veritate alienum, inventis facile esse aliquid addere, & multa nostris temporibus in studiis philosophicis esse inventa, veteribus vel plane incognita, vel nondum ab iis tacta. Nemini proinde vitio vertendum, si non in omnibus cum altero consentiat & in veterum sententiis emendandis, corrigendis & augendis suam collocet operam. Verum modeste hæc fiant, & eo loco, ubi necessitas postulat, nec non hoc fine, ut ad veritatem & proximi utilitatem semper habeatur respectus. Quando vero multi ex ambitione, arrogantia, novitatis & singularitatis studio negotium aggrediuntur, nec in veritate, sed scommatibus, contumeliis & obtrectationibus acquiescunt, res cum summo studiorum periculo & ruina conjuncta est. Hinc omnes, qvia alii videri volunt, ac revera sunt, crepant præjudicia, quæ tamen ab adversario sæpe nō commisfa, sed in proprio saltem hominis maleferiati cerebro enata sunt. Videat autem quilibet, ne in judicando honestatis & charitatis christianæ limites transgrediatur, nec plus faciat, quam salva conscientia potest. Nam nec omnia probare, nec omnia reprehendere consultum: hoc uti fastuosum & malignum; ita illud socordem & tardum indicat hominem. Optimum ergo fuerit, ita versari circa aliena, ut non judicium saltem, sed & æquitatem ad ea afferamus; nec dum veritatem sectamur, humanitatis faciamus jacturam. Hoc, non alio animo præjudicia, quibus maximum studiorum damnum passim tribuitur, examinabimus, non tam ut alios corrigamus, quam ut nobis ipsis caveamus. Cui proposito, ut propitium velit esse Numen, submissis precibus rogamus!

§.I. De

§. I.

**D**E præjudiciis dicturi originem vocis ante omnia excutientiam sumimus. Ubi in antecessum notandum, duabus imprimis facultatibus gaudere animam rationalem, quibus reliquis formis Physicis contradistinguitur, intellectu nempe & voluntate. Et quidem intellectus est facultas ad verum cognoscendum ordinata; voluntas vero ad bonum appetendum. Mūnia itaqve intellectus sunt, ut res sibi objectas cognoscat ac dijudicet, vel euni in finem, ut veritatem carum saltem perspectam habeat, vel ut non solum sciat, sed etiam ea, quæ cognita sunt, agantur: ubi ex priori intellectus theoreticus, ex posteriori practicus resultat. Omnia autem quæ ita cognoscuntur ab intellectu, in dupli sunt differentia, vel enim principia sunt, vel conclusiones. Per principia intelliguntur ejusmodi propositiones manifestæ & per se seu natura notæ, quarum veritas statim cognoscitur, simul ac menti objiciuntur, seu termini ipsarum intelliguntur simplices. Conclusiones vero tales sunt propositiones, quarum veritas perspecta hād est, nisi aliunde eruatur, & vel inductione, vel syllogismo nobis innotescat. Unde integræ Disciplinæ Philosophicæ nihil aliud sunt, quam habitus ex ejusmodi conclusionum congerie in intellectu nostro habiti. Quodsi ergo ex talibus principiis natura notis legitime aliquid deducatur, id recta ratio seu rectum intellectus judicium audit. Unde constat, judicium non esse ipsum intellectum, sed potius fœtum ejus. In consideratione enim & cognitione rerum ratiocinamur & judicamus, unde ipsum judicium sequitur. Quoties proinde cum sana ratione vel recto intellectus judicio aliquid congruere pronuntiatur, idem est ac si diceretur, verum illud esse ac certum, vel quod sit ipsum aliquod principium natura notum, vel potius, quod ex tali principio per legitimam consequentiam fluat. Cognitis itaqve iis, quæ ad naturam judicij explicandam facere poterant & unde judicare dicimur, facile etiam erit intelligere præjudicium; præjudicare enim est quasi ante-judicare & præjudicium quasi anticipatum seu immaturum judicium, imo judicij defectus est.

§. 2. Ne autem Jctorum reprehensionem incurramus, observare hic conductit, terminum hunc præjudicij originem suam debere foro juridico, a quo ad alias deinceps res denotandas in

reliqvis facultatibus mutuo fuit desumptus. Non una vero apud  
JCTos termini hujus acceptio est. Retrocurrit enim nonnun-  
qvam cum *læsione* aut *damno*, v. g. quando dicuntur; *Privile-  
gia principum alicui concessa non esse cum præjudicio alterius  
interpretanda*. Item rem inter hos vel illos actam non præjudici-  
care aliis &c. Quandoque vero eadem vox *exceptiones* illas præ-  
judiciales denotat, qvibus reus ita removet agentem, ut ad-  
struat, per actionem ab illo institutam non debere præjudicium  
fieri actioni principaliori. Interdum & ad ipsas *actiones* re-  
stringitur, qvæ præjudiciales seu *præjudicia* propterea audi-  
unt, qvod judicium earum prius finiendum sit, & tunc lo-  
cum habent, quando prius judicari quid debet, anteqvam ad prin-  
cipale negotium progrediatur. Ut plurimum vero apud JCTos  
præjudicium pro *re decisa* aut *judicata* sumitur, ut sententiam  
indicat, a judice legitime latam & pronunciatam, qvæ deinceps  
in pari causa judicaturis exemplum præbet, qvod seqvi possunt,  
qyoniam vim decidendi habet. Utut autem hæ *acceptiones* ad  
propositum nostrum non spectent, adducendæ tamen propter-  
ea fuerunt, ne quis putet, nos, dum contra præjudicia pronun-  
ciamus, illa intelligere, qvæ in scholis juridicis alias observanda  
proponuntur.

§. 3. Ut vero proprius ad scopum perveniamus, ita descri-  
bere *Præjudicium* liceat, qvod sit *judicium mentis infirmum ex er-  
roneis opinionibus ortum, veritatis consecutionem impediens*. Cur  
infirmum judicium dicatur, nemini potest esse dubium, nempe  
qvod antevertat judicium firmum & rectæ rationi congruum;  
qvæ anticipatio fit, si intellectus in rebus cognoscendis seu mate-  
riis judicandis debitam haud adhibet industriam, nec mentis aciem  
intendit, sed vel in ipsis principiis, vel in illorum applicationibus  
peccat, vel ab affectibus plane obscuratur. Cumqve hic conce-  
ptus aliis quoque conveniat, dubitationi v. gr. idcirco vicem ge-  
neris illum sustinere h. l. posse arbitratur. Differentia de-  
sumpta est partim a causa, partim ab effectu. Causam dicimus  
esse opiniones erroneas, qvæ multis modis hominum animos  
occupare solent, adeoque mentis assensum ad se trahere, ante-  
qvam recte consideravit intellectus, num veri vel falsi aliquid  
subsit.

subdit. Hinc effectus facile intelligitur, nempe impeditio veritatis conseqvendæ, utpote qvæ ultro ex prioribus fluit; dum enim per tales opiniones intellectus quasi ligatur, quo minus vires suas exerere possit, ut rectum & firmum evadat judicium, non potest non veritatis consecutio impediri, quippe qvæ ad rectam causæ cognitionem & justum ratiocinium demum sequitur.

§. 4. Ne quis vero præjudicia cum dubitationibus, opinionibus, ignorantia &c. confundat, notanda erunt qvædam eorum adjuncta. Qvorum *primum* est: *firmiter esse menti impressum*, qvo pacto subjectum præjudicio laborans erroneam opinionem ita sibi persuadet, ut verissimam illam putet, contra qvam nemo aliqvid in contrarium afferre queat. Ex qvo apparet, per hoc ipsum distingvi præjudicium ab opinione, qvæ ex argumentis probabilibus oritur in re contingentí, ubi aliquis in sententia non adeo certus est, cum opinio semper cum formidine oppositioni sit conjuncta. Ex hoc fluit *secundum*: *cum pertinaci assensu esse conjunctum*. Sic intellectus præjudicio fascinatus ita adhæret falsæ sententiæ, ut nullis rationibus in contrarium possit flecti, quicquid etiam alter dicat. Quæ pertinacia tamen imprimis in præjudiciis affectuum animadvertisit; nec perpetua semper est, sed interdum ad tempus saltem. Nam si nulla plane pertinacia judicio intellectus juncta, potius levem errorem dixerim. Ex qvo simul apparet distinctio præjudicij a dubitatione (quamvis & prius requisitum hoc præstet) qvæ est suspensio & ambiguitas animi, in æquilibrio quasi constituti, adeoque circa diversas sententias nec assensum, nec dissensum præbentis, ex qvibuscunque demum causis illa suspensio oriatur, de qvibus vid. Gisb. Voëtius dispp. Select. p. 3. pag 827. *Tertium: ortum esse sine debita intellectus industria*; propterea enim præjudicium audit, qvia intellectus debitam causarum connexionem, circumstantiarum & rationum efficaciam aliaque media veritatis cognoscendæ, qvæ tamen legitime adhibenti negata non essent, non expectat, sed in judicando anticipationem committit & quasi ante tempus judicat, unde etiam satis commode immaturum judicium dicitur. Qvo ipso manifeste differt præjudicium ab ignorantia, quæ communiter impotentiam seu defectum naturalem intellectonis con-

geni-

genitum vel accessorium, nec non barbariem, quando qvis literis ac moribus minime exultus est, denotat, vid. Voët, l. c. p. 632. Utut alias præjudicium cum ignorantia conjungi haud inviti largiamur. Plura possemus adducere adjuncta, sed sufficient hæc pro chartæ angustia, ex qvibus reliqua facile intelliguntur.

§.5. Missis his, qvæ ad naturam præjudiciorum in genere declarandam facere posse videbantur, ad diversitatem eorum pergitimus. In hanc autem (relictis distinctionibus inutilibus) non melius penetrare nos posse confidimus, qvā excussis causis, ex qvibus præjudicia communiter oriri solent. Ubi, qvamvis omnia generaliter ad intellectū obscuratum aut seductum referenda sint; hæc tamen remanet distinctio, qvod in qvibusdam intellectus propria sua culpa peccet & cum possit meliora & saniora seqvi veritatis indagandæ media, nihilominus his neglectis aliis se alligare quasi gestiat, & sic vitium in judicando comittat; in qvibusdam vero intellectus obnubiletur & confundatur citra propriam culpam, ut veritatem cognoscere nequeat, qvod efficere ut plurimum solent affectus. Quibus presuppositis non incommoda erit distinctio *præjudiciorum* in *intellectus* & *affectuum*, qvæ tamen distinctio generalis varias admittit subdivisiones, uti mox videbimus.

§. 6. Et qvidem qvod præjudicia *intellectus* attinet, ubi ille de re minus accurate considerata præcipitanter judicat, variae offerunt momenta, ex qvibus talis præcipitantia oriatur. Primum locum teneant *sensus*. Ex his enim corruptis, aut qvacunque de causa male dispositis, si intellectus de re aliquia judicat, *præjudicium sensuum* committit. Sensus enim varias menti imprimunt ideas, qvodsi ergo sensus imperfecte recipiant objectum, aut res dijudicanda non ad evidentiam sensuum reducta fuerit, non poterit non exinde talis oriri idea, qva in judicando decipiatur intellectus. Tale præjudicium commisit *Lucret.* lib. 5. qui de magnitudine solis, lunæ, reliquarumque stellarum ex illa apparentia judicavit, quam habent ad visum nimis distantem. Sic qui in loco undique clamoribus replete constitutus est, de harmonia aut concentu musico judicare non potest. Nec febricitanti concessum est judicare de sapore, cum propter depravatum organum plurima ipsis soleant esse amara. Absit vero ut propterea aliquis tol-

lere

lere velit sensus ceu minus idoneos ad rerum cognitionem , quem  
admodum de Hegesiaco id refert Diog. Laert. Lib. 2. de vitiis Phil. p.  
m.99, de quibusdam Academicis idem affirmit B. Dan. Sennertus lib.  
7. Natural. Scient. cap.1. p. 563. quod omnem fidem sensibus deroga-  
verint. Evidem in excessu peccarunt olim Epicurei , tantum  
sensibus tribuentes, ut nusquam nos falli putarent, uti refert August.  
Lib.8. c.7. de C.D. Interim cum Deus & natura nihil faciant frustra,  
sensus vero cognitionis gratia concessi sint, lubentes hic assentimur  
doctrinæ Physicorum, statuentium sensus circa proprium objectum  
errare haud posse, positis nempe legitimis ipsorum requisitis, *justa*  
*distantia, medio legitimo, & recte disposito organo.* De quibus vid.  
B. Sennert. l.c. B. Sperl. Lib.8. Inst. Phys. q.1. p.1074.

§. 7. Patet autem ex dictis, quid de illis habendum, qui in Theolo-  
gia naturali ejusq; veritatibus cognoscendis dubitationem circa ejus  
principia & axiomata tanquam causam, principium & tutissimam  
viam liberandi homines ab omnibus erroribus & præjudiciis, com-  
mendant, eo, quod nulla illorum principiorum habeatur certa co-  
gnitio, nec per sensum, nec per intellectum, cum iterque falli possit.  
Hæc enim ratio argumentandi, a fallibilitate sensuum ad dubitatio-  
nem universalem de omnibus rebus, Pyrrhonismo & Scepticismo  
familiaris nulliusque momenti est. Imo præjudicium stultæ argu-  
mentationis hoc ipso committitur, de quo mox, quando ex eo, quod  
sensus interdum fallendi ansam intellectui suppeditarint, colligitur:  
sensus semper fallere posse. Hoc enim certis saltem negatis sensuum  
requisitis fieri §. præc. notavimus. Et quid dicendum esset de illis  
Scripturæ locis, ubi Deus, Salvator & Scriptores S. ad sensuum co-  
gnitionem & evidentiam provocant & homines eo amandant? Præ-  
terea modus ille concludendi non procedit, quid enim sentiendum  
esset de Theologia revelata, num propterea nulla certa Theologiæ  
supernaturalis & articulorum fidei ex Scriptura S. poterit haberis  
notitia, quod omnes homines possint falli & fallere? num propter-  
ea de ipsa Scriptura S. de omnibus articulis fidei dubitandum? Cre-  
do quod non, sed hæc expediant Theologi.

§. 8. Secundo loco se offerunt absurdæ rationes argumen-  
tandi, quando ex iis aliquid concluditur, ex quibus vel plane nihil,

B

vel

vel ad minimum illud non sequitur, quod probandum erat. Unde *præjudicia inconveniens ratiocinationis*. Huic vero inconvenienti & absurdæ ratiocinationi ansam præbent (i) *termini non recte apprehensi seu perverse intellecti*. Ut enim conceptus nostros aliis manifestare queamus, terminis & notionibus opus est, quibus id commode fiat. *Quod si ergo termini non recte intelligantur, & nihilominus ejusmodi falsæ terminorum explicationi argumentum vel ratiocinatio superstruatur, non potest non lapsus judicii sequi.* Tali præjudicio olim laborabant Stoici, qui simpliciter affectus extirpandos & eradicandos esse contendebant, eo, quod mali, contra naturam & rationem essent, unde opiniones pravas, judicia levitatis, morbos animi & peccata dicebant. Cum tamen potius sint motus a natura insiti seu facultates naturales. Stoici ergo terminum non recte intelligentes sumebant affectus pro eorum excessu. Ejusdem præjudicium accusandi sunt, qui spiritum in loco esse concludunt ex illo, quod alias sequeretur, spiritum esse nusquam; confundunt enim locum cum ubi seu πόσις; aliud enim est localitas, aliud ubertas: non illa, sed hæc spiritui competit. Impingit circa hanc doctrinam Antonius Le Grand, qui part. 2. Inst. Phil. art. 8. p. 89. arbitratur: inter præjudicia, quæ a puerili ætate homines hauferint, nullum Philosophantibus periculosius videri, quam illud, quod Aristoteles docet: *Omnia que sunt, alicubi esse*. Periculum, quod ex hac sententia metuit, illud est, quod Deus hac ratione non maneat immensus, sed simul cum reliquis substantiis immaterialib⁹, determinato aliquo loco comprehendatur, adeoque extensionem involvat, quæ tamen spirituali ipsarum essentiæ plane repugnet. Verum, dum ita sedulo præjudicia evitare studet le Grand, ipse insigne inconvenientis argumentationis præjudicium incurrit; τὸ alicubi enim ipsi idem est ac certum aliquod spatum locale & τὸ esse alicubi idem ac spacio locali circumscribi. In quo tamen maxime fallit. Implicat enim revera esse seu existere, & tamen non esse alicubi seu in aliquo ubi, ex quo statim aliquis posset concludere, spiritum nullibi esse: quod vero nullibi est, id plane non est. τὸ alicubi ergo generalius sumi debet, quatenus a finito & infinito ubi abstrahitur. Ut adeo ubertas infinita sit, qua quid est in omnibus

bus ubi, s., qva quid, cum hic sit, simul sit ubi vis alibi; ubetas vero finita, qua quid est in ubi determinato, idque vel sine vel cum circumscriptione. Prius fit, quando aliquid definitive, si hic est, non simul est alibi, indivisibiliter tamen & sine extensione quantitativa. Posterior vero, quando aliquid partialiter & divisibiliter in loco circumscribitur. Sic vero & spiritus increatus & creati, nec non corpora ab hoc termino participare possunt. Concedit quidem Le Grand, dici posse, *Deum etiam esse nullibi*, quod quidem largior, si addatur *tanquam in loco*, alias, si generaliter intelligantur verba, multa absurdia exinde fluunt.

§. 9. Absit vero, ut ad evitanda hæc præjudicia, quæ ex perverse intellectis terminis oriuntur, omnium terminorum Philosophicorum usum improbare velimus, quorum accurata cognitio potius facit, ne ejusmodi præjudiciis impingamus. Certe immane præjudicium est, quod Anabaptistæ & cum illis multi alii committunt, dum omnem Philosophiam & debitum ejus usum rejiciunt, eo, quod impediat studium theologicum. Nunquam illud, credo, assererent, si Philosophiæ naturam haberent perspectam. Est enim illa nihil aliud, quam ipsa rectæ rationis & luminis naturæ dictata, seu principia nobis congenita, & ex iis legitime deductæ conclusiones. Horum vero cum ipse Deus autor sit, non potest illis aliquod impedimentum vel damnum in Theologia adscribi, nisi omnem ejus causam in Deum redundare simul velimus: quod vero impium & absurdum. Objiciunt quidem (licet hic pauca ex Theologia mutuare, ut objectioni occurramus) Philosophiam esse sapientiam carnis, quæ inimicitia adversus Deum est, juxta Paulum Rom. 8, v. 17. Verum h. m. idem incurrit præjudicij vitium, dum aliam Apostolo affingunt mentem, quam unquam habuit, intelligit enim ille per sapientiam carnis, non Philosophiam, eamque rectam ac gunuinam, sed talem sapientiam, seu insipientiam potius, quam hominis corrupta ratio suggerit, adeoque quæ non in doctos solum, sed etiam indoctos, rudes ac Philosophiæ ignaros cadit. In aliis autem locis idem Apostolus Paulus sape Philosophiam corruptam seu Philosophiæ abusum rejicit; ex quibus ergo nihil potest inferri. Mirum autem est, illos etiam, qui defensores tamen Theologiæ esse deberent, in illam quoque propen-

dere sententiam. Cum enim Philosophia ad quasvis res intricatas melius capiendas intellectum nostrum præparet, certe in Theologia etiam omnis plane utilitas ipsi denegari non poterit. Habet quippe Theologia innumeros ferme terminos, ex Philosophia desumptos, quibus res Theologicas exprimit, quorū ergo acceptio ac sensus exinde repetendus est, ut facilius in Theologia intelligentur. Non desunt forte, (ad usum imprudenter trahentes, quæ de abusu intelligenda ab aliis percepérunt) qui terminos philosophicos omnes ex Theologia eliminatos cupiunt, eoque nomine systemata Theologica rejiciunt; verum si unquā præjudicium præcipitantiæ aliquis commisit, certe hoc est. Quid enim aliud illud foret, quam a via revocare studiosos ad devia, & ingrato animo rejicere maximorum virorum labores, qui laudato conatu ad facilitandum studium Thologicum talia conscripserunt. Imo quid fieret demum de adversariis, qui communiter tela sua ex ratione depremunt, quibus veritates Theologicas impetunt, nonne viæ manus ipsis erunt præbendæ, nisi demonstretur, argumenta ipsorum effectis niti atque falsis principiis, vel axiomata philosophica genuina in sensum alienum contorqueri, ac fraudulenter vicioseque complicari? Conferatur hic *Scheiblerus* in *proœn. Metaph.* c. 2. n. 5. qui, ignorantiam Philosophiæ frequenter occasionem fuisse, magnorum in Theologia errorum, afferit, idemque exemplo Flacii, Vorstii, &c. confirmat.

§. 10. *Absurdam argumentationem*, & resultantia inde præjudicia juvant etiam (2) *experimenta*, quibus Physica & Medicina imprimis scatent, dum enim ejusmodi experimentum particulare in regulam degenerat, & axioma aliquod universale construit, quod necessitatem quasi assensus aliis imponit, certissime hinc præjudicia oriri manifestum est; fit enim argumentum a particulari ad universale, quod inepte semper concludit. Nihilominus quidam ex modernis Physicis tanta incedunt arrogantia, ut qualitates occultas in universum, antipathias & sympathias rideant, & omnia experimentis & certis causis demonstrare se velle liberaliter pollicantur, cum tamen sæpe inter eos non magis conveniat, quam inter horologia, & uno eodemque experimento plures sæpe utantur ad diversas hypotheses probandas. Ut hac ratione longe melius sit iudic-

dicium eruditissimi viri Gisberti Voëtii part.3. Dispp. sel. de ignorantia docta p.m. 679. quod ita habet : *In Physicis quamplurima nobis ignota sunt, & aliqua in hac vita non cognoscibilia.* Pauca saltem illorum præjudiciorum adducam, quæ experimentis suam debent originem. Res notissima inter Physicos est, quod soleant numerum & naturam elementorum per genesin , vel quod magis fit, per analysin seu resolutionem corporum in sua minima demonstrare. Hinc tot diversissima pro diversitate sententiarum oriuntur experimenta , quæ tamen raro probant, quod probare debent v. g. Ita Joh.Bapt: Helmontius probaturus, aquam solam esse elementum, tali experimento utitur, quod nempe acceperit terram aliquot librarum , quam in cibano probe siverit exsiccari, post in vas conjecerit, & addiderit demum aquam, unde arbor orta centum librarum. Ita proinde infert: ex terra nata fuit arbor, & a terra nihil recessit, quam vel quarta pars libræ, nihil autem præter aquam additum, ergo ex aqua excrevit fructus. Verum experimentum illud plane non probat sententiam Helmontii cum probandum ipsi prius fuisset, aquam extitisse purissimam, & nihil aliud habuisse admixtum. Deinde stetit arbor in aëre, qui profecto varia habet effluvia &c. Idem Helmontius de liquore gloriatur, quo mediante omnia corpora in aquam resolvere possit. Sed esto hoc, (de quo vero multi dubitant) non tamen sequitur, corpus est in liquorem redactum , ergo est ex aqua. Ita pro vacuo demonstrando varia solent afferre experimenta, quod aërem possint ex utribus &c. ita extrahere, ut ingrediens vivum moriatur, quo experimento Otto Gerike usus est, cuius prostant experimenta Magdeburgica in folio. Verum hoc experimentum nihil pro vacuo demonstrando facit, cū non omnis, sed crassior solum aér extrahatur, qui ad respirationem facit; hinc etiam est, quod montes altissimos ascendentis vix respirare queant, quia aer ibidem purior est. Neminem quidem mihi tam absurdum fingo, qui experimenta plane ex Physica eliminare vellet, nam necessitas sœpissime talia exigit, ut varia instituantur experimenta chymica, anatomica, mechanica, magica, aliaque id generis, quæ summam certe utilitatem habent." Verum caute hic procedendum est, ne temere fiant, sed talia, quibus ratio lumen

accendat & viam commonstret. Nec axiomata prius ex illis construantur, nisi perspecta sit ipsorum veritas, & an directe faciant ad rem probandam, nec ne? Alias enim facillime falluntur. Hinc est, quod Robertus Boyle in tract. Phys: de experimentorum successu testetur, maximam partem experimentorum, quae ab aliis acceperit, fuisse falsa. Sic Joh:Bapt:Du Hamel recte observat, non esse experimenta, in quæ casu incidimus, sed quæ certo ordine & fine instituta sunt. Quemadmodum ergo ratio in rebus naturalibus sine experientia sâpe vaga est & fluctuat, ita vicissim experientia sine ratione cœca est, nec sibi constat, neutra proinde sibi sola sufficit, sed semper hæc duo conjuungenda, & observandum est & ratiocinandum. Sed hæc expedienda relinquimus Physicis. Nostrum fuit per exempla declarare, quomodo præjudicia experimentorum committantur, & qualis ipsis paranda medela.

S. II. Liceat huc etiam referre ad *inconvenientis ratiocinationis* præjudicia (3) illa, quando de prudentia vel imprudentia consiliorum ex eventu judicamus. Fieri nempe sâpiissimæ solet, ut eventus longe aliter cadat, ac unquam alicui fuisset persuasum; ut hac ratione ineptissimum imo impium consilium bonum possit nancisci exitum, prudens vero ac pium eventum pessimum. Qui vero ex his de natura consiliorum judicare vellet, immanc committeret præjudicium. Sangvinolentum & pessimum erat consilium, quod fratres Josephi de ejus venditione conceptum in actum etiam deduxerant, licet ex parte Josephi non solum, sed integræ ejus familiae optimus seqveretur exitus. Hoc vero non consilio fratum, qvod impium & abominandum manet, sed speciali directioni divinæ erat adscribendum. Qvis quæso ex omnibus Romani Imperii membris judicasset, bonum a parte nostri esse consilium, qvod Imperatori Turcarum suppeditatum fuerat respectu obsessionis Viennæ; cum tamen nihil felicius atque melius obtingere nobis potuisset. Absit vero ut propterea dicamus, bene illum de nobis sensisse & cogitasse, qui autor ejus consilii fuit. Quamvis ergo bona consilia sâpe comprobant eventus, & mala detegit; non tamen ex eventu tanquam certo momento perpetuo omnia dijudicanda sunt consilia. Hinc, cum necessum est omni-

omniō sit, ut Principes a latere habeant viros pr̄tendentes, rerumque peritos, quorum juventur consiliis; bene fecerint, si non uni se mancipent, sed omnes audiant, & libertatem dicendi concedant singulis. Sic enim consideratis utrinque circumstantiis & rationibus, accuratius poterit judicare de suppeditato consilio, quam si solo eventu eadem metiri velit. Hanc libertatem inferendis sententiis omnibus aulicis concessit Constantinus Imperator, cuius hæc fuit constitutio: *Si quis est, cujusque loci, ordinis, dignitatis, qui se in quemque judicum, comitum, amicorum, vel Palatinorum meorum aliquid veraciter & manifesto probare confidit, quod non integre aut juste gessisse videatur, intrepidus ac securus accedat, interpellet me, ipse audiam omnia, ipse cognoscam: & si fuerit comprobatum, ipse me vindicabo, & dicat securus, & bene sibi conscientius dicat: Si probaverit, ut dixi, ipse me vindicabo de eo, qui me usque ad hoc tempus simulata integritate deceperit. Illum autem, qui hoc prodiderit, & comprobaverit, & dignitatibus & rebus augebo.* Vid. Jacob. Martini Lib. 2. Polit. p. 819. Nec inconsultum fuerit, Alphonsum Regem Aragoniae imitari, qui mutos quoque ac mortuos senatores (legebant quippe diligentissime opinios scriptores, imprimis Cæsarum) in complexum assunxit, quod hos cupiditate ac metu vacuos liberimis vocibus, quicquid aut facto opus esset, admonituros existimat vid. Aug. Buchner. in Diss. Acad. Disp. 391. pag. 537. Neque Principum saltem hæc cura sit, sed omnium etiam, qui aliorum consiliis utuntur, vel de iisdem ferre debent judicium.

§. 12. Ad præjudicia inconvenientis & ineptæ ratiocinationis maxime etiam referuntur (4) illa, quæ ex modo propenendi oriuntur. Nihil communius est, quam ut scripta sanctitate referta apud multos inveniant assensum, præ aliorum scriptis, quibus in more positum non est ostentatione quadam affectare sanctitatem, cum satius sit sanctum & religiosum esse quam videri. Quam noxium autem hoc absurdæ ratiocinationis præjudicium sit, ille haud difficiliter animadvertis, qui sententias, quæ de variis scriptis saepe latæ sunt, paulo accuratius pensabit. Certe diabolus in angelum lucis se transformare facillime potest

poteſt & incautis offerre fucum. Quam affectata qvæſo ſanctitas non occurrit in iſis pontificum conſtitutionibus contra B. noſtrum Lutherum. Quoties non provocat Papa ad ſuam conſcientiam & ſummam induſtriam, qvam in promovenda gloria diuina & nominis ejus adhibeat, cum tamen mera mendacia ſint. Quid vero ad hæc Lutherus? Detrahit iſi ſanctitatis & religio- niſ larvam, verbiſ non ſemper lenioribus, ſed duris ſæpe, ſi ne- ceſſitas poſtulet, uſuſ. Certe hoc ſemper hæreticorum, qvi ma- ximum ecclesiæ damañum intulerunt, proprium fuit, ut ſub ſpe- cie & prætextu ſanctitatis tum voce, tum ſcriptis hominum oc- cuparent animos, qvod nemiſi ignotum eſt, qvi omnium ſecu- lorum a Christo nato historiam eccleſiaſticam cognitam habet. Novatiani nonne ſuperbissimo atque odiosiſſimo catharorum titulo ſe efferebant, propter ſpecialem munditiem, qvam ſibi ven- dicabant? Donatiſtae tantam ſibi tribuebant ſanctitatem, ut ec- cleſiam per totum orbem terrarum diſpersam propter vitia mo- rum periſſe аſſererent, excepto angulo illo Africæ, qvo iſi degebat. Nestorius, quo eo melius ſanctitatem, qvam præ ſe ferebat, hominibus perſuaderet, nihil eorum omiſit, qvibus propo- ſitum obtinere poſſet. Hinc præter pallorem vultus & maciem corporis, utpote iſi natuiales, cogitaſundam ſibi acqviſirebat, frontis gravitatem, moleſtam qvandam triftitiam, pullam veſtem, cum quibus ſolitudiniſ amorem conjungebat. Et quid opus eſt, hæc reſenſere, de quibus omnes loquuntur ſcriptores. Sufficit nobis declarare, quod in ſcriptis, qvæ tam ſpecioſe affectant ſan- ctitatem, ſæpe ſumma lateat ſpurcitas: ex tali prætextu ergo, ſi qvis de integritate & fide autoris aut doctrinarum veritate judicare velit, non poterit non fallere aut falli & ſic præjudicium abſur- dæ ratiocinationis committere. Eadem qvoque ratio eſt, ſi qvis rerum veritatem ex ornatu verborum, falsitatem vero ex verbis neglectim appoſitis eruit. Tali præjudicio ut plurimum ſe pro- ſtituunt, qui, dum nihil in ſcriptore taxare audent, ſtylum & latini- tam carpunt, ut nihilominus gloriæ iſiſius aliqvid detrac- tent, cum tamen qvæſtio non ſit, quam ornate & eleganter, ſed qvam vere ſcripſerit: utut alias nullus negaverim, magnam ſcriptoris gloriam

gloriam in ornatū & elegantia orationis esse sitam ; qvæ tamen in philosophicis & theologicis observari semper non potest. Similes profecto tales sunt rusticis , qui ex voce grandisona & clamore stentoreo de concione judicare solent. Certe vix inter doctos numerari merentur , qui ejusmodi suco atque nebula oculos sibi obscurare patiuntur. Aut enim aliquis plane sustineat judicium, aut in judicando se ita gerat , ne cum aniçulis conferatur , qvæ plus sæpe fidei habent circulatori absurdo, qvam perito Medico , qui tantis ambagibus medicinam suam non commendat.

§. 13. Demum ad inconvenientis ratiocinationis præjudicia (5) & illa spectant , quando ex patria de hominis ignoti inge-  
nio & moribus judicamus. Verum quidem est loca , ubi quis na-  
tus est , multum conferre ad hominum ingenia , unde diversæ gen-  
tes vel bene vel male audiunt ratione virtutum vel vitiorum ipsis  
qvasi congenitorum. Ita Germanorum beneficentia & bellandi  
ardor ; Italorum superbia & vis ingenii ; Gallorum intemperan-  
tia , levitas , & temeritas ; Asiaticorum mollities ; Cretensium  
mendacia , satis a scriptoribus declarantur , de qvibus conferri  
possunt . Barcl. in Ieon. Anim. Neubusius in Theat. ingen.  
bum. Huart. Scrut. ingen. aliique plures , qui illam materiam  
ex professo tractant . Verum hæc non perpetua sunt , nec  
ad omnes semper quadrant. Quo ergo melius aliquis ab ejus-  
modi præjudiciis sibi cavere queat , probe observe : dari qui-  
dem certas notas populorum & gentium , verum ita compara-  
tas , ut æternæ & perpetuo constantes non sint , sed mutabiles  
maxime. Certe qui ex Taciti antiquorum Germanorum descri-  
ptione , & moribus illis assignatis , modernos judicare vellet , ma-  
gnum committeret præjudicium. Germania enim hodie longe  
aliter se habet , & cum olim inculta & maxime barbara gens fue-  
rit , jam satis eam excultam , & paucis elegantia cedere , manife-  
stum est. Ita si Gallorum mores a veteribus , Cesare , Livo &c.  
descriptos consideramus , non omni ex parte cum modernis con-  
venire , ex recentioribus scriptoribus potest esse manifestum. Imo ,  
utut omnia inter scriptores veteres & retentiores de Gallorum  
moribus & ingeniis inter se conspirarent , mollitem tamen & tæ-  
C dium

dium laboris ac belli sustinendi, ipsius passim tributum, vel bellum hactenus gestum, declinare ab iis & removere videtur. Posse autem facile mutari ita populorum ingenia, ex variis ipsorum commerciis, migrationibus, commixtionibus, negotiis bellicis &c. nemini facile erit dubium. Sed esto, compertum aliquis maxime habeat, ita vel aliter hujus aut istius nationis comparata esse ingenia, illud tamen non de omnibus individuis intelligat, cum tales gentium descriptiones de plurimis saltem loquantur. Sic Germani passim propter bibacitatem male audiunt, absit vero, ut de omnibus ac singulis id ipsum procedat. Nam in gentibus libidinosis etiam temperantes; in bellicos ignavi, in superbis modesti; in mendacibus veraces inveniuntur. Ut sic univer- saliter pronunciare non liceat.

§. 14. Tertio loco ad præjudicia intellectus referuntur præjudicia *Autoritatis*. Committuntur autem hæc, quando vera judicamus esse, quæ ab hoc vel illo in autoritate constituto percepimus, non considerata simul re ipsa, an ita se habeat nec ne? Faciunt autem huc imprimis personarum pietas, ætas, dignitas, existimatio, aliæque circumstantiæ, quæ mentibus hominum fucum vendere possunt. Tale præjudiciorum genus impingunt communiter omnibus Philosophis sectariis, qui scilicet vel Aristotelicos, vel Stoicos, vel Cartesianos &c. se profitentur. Et verum quidem est, si quis ita in verba unius Magistri juraret, ut nulla in parte ab eodem recedendum putet, quicquid etiam alter dicat, aut quacunque demum ratione cum veritate comparatum sit. Alias, si unum sibi proponat, quem imprimis sequatur, ita tamen, ut non cœco impetu omnia ejus asserta approbet, sed sub examen vocet singula, & quandoque, necessitate urgente, quædam etiam mutet, addat, detrahatur &c. tunc a præjudiciis autoritatis liberari illum posse, facile concesserim. Est certe magna vis ad movendos hominum animos in diu spectatæ probatæque virtutis opinione posita: ac multi quiescunt & continent se, non quod cohibiti viribus, sed clarioris fortitudinis metu pacem malunt. Quid ergo mirum, si in eruditorum quoque certaminibus ac controversiis componendis aut reprimendis autoritas sæpe profacun.



facundia sit, nec magis obtineat, qvi plurimum contendit, qvam  
qvi posse plurimum videatur? Nec nego, conducere s̄epe, ut viri  
inter eruditos maximi tanta polleant autoritate, qvorum judicio  
controversiæ qvædam inutiles & meræ s̄epius rixæ componan-  
tur: qvia alias nemo facile a tenaci proposito desistit, & in infi-  
nitum augentur lites.

§. 15. Cum autem satis tritum fit, *præjudicia autoritatis* ho-  
minibus etiam verissima docentibus objicere, videbimus brevissi-  
mis, quantum veritatis talia obtineant. Hic autem præ cæteris  
observandum, non statim *præjudicia autoritatis* illum committere,  
qvi non cuivis sciole in recentiori qvadam sententia statim assur-  
git, sed cum veteribus facit, siqvidem se satis rationibus munitum  
novit, qvibus in defendenda sententia uti queat. Certe pluri-  
mi Philosophi hodiè adversa fronte mutuo in se incurruunt, &  
nemo eruditus judicatur, nisi qvi aut veteres de ponte dejicit,  
aut novas hypotheses nova etiam cudit principia, s̄epe tamen  
absurdissima. Quo ipso tam difficile ac tædiosum redditur stu-  
dium philosophicum, ut multi a summa ejus utilitate absterre-  
antur. Percurrat aliquis omnes Philosophorum sectas recentio-  
res, & nullo negotio deprehendet, illos, qvi a *præjudiciis* im-  
munes se servare volunt, grandia & pessima s̄epe, licet aliis ge-  
neris, committere *præjudicia*. Nam magnum statim perversi ani-  
mi signum est, qvando aliquis in hac vel illa opinione a veteri-  
bus abit, & reliquos cum his sentientes fugillat, traducit, *præ-  
judiciis* autoritatis onerat, adeoque bellum ipsis indicit. Eo ipso  
enim turpe philautiæ illicitæ *præjudicium* incurrit, de qvo in sub-  
seqventibus agemus. Hæc qvippe via ad inveniendam veritatem  
non est, sed potius tales illa requirit gradus, ut aliter sentiens  
modeste suam sententiam proponat, aliorum judicia & rationes  
in contrarium expectet, ut sic ab utraque parte scrutinium veri-  
tatis suscipiatur, & consideratis utrinque rationibus sine acerbitate  
& bile demum manifestum appareat, qvidnam veritatis sen-  
tentiae cuidam subsit, qvid minus? Si hoc modo res acta & com-  
pertum fuerit, rationibus manifestis & apertis aliquem esse con-  
victum, qvi tamen nihilominis sola veterum autoritate pugnare,

**A** & in clarissima veritatis luce cœcutire malit, tunc sine dubio, eundem præjudicium autoritatis committere, affirmare possumus. Verum nihil intolerabilius est, qvam si quis sibi soli monopolium sapientiae vendicat, & reliquos sicut umbras volitare credit, adeoque nil nisi præjudicia autoritatis crepat, cum tamen nunquam demonstraverit, nec demonstrare forte possit, opiniones aliorum ac sententias sibi contrarias falsas esse: quod tamen recta ratio & æquitas postularet. Res enim profecto magni momenti est, accusare aliquem præjudicii autoritatis, qvia idem est, ac si summam ignorantiam & supinam de eo affirmarem negligentiam. Unde cautæ hic procedendum, cum res ut plurimum facilius dicatur qvam probetur.

**S. 16.** Ut vero appareat, non semper audiendos esse, qvi nova proponunt, sub prætextu veritatis, qvæ hactenus quasi suppressa, jam vero resuscitata ab ipsis sit, non de omnibus philosophis demonstrabimus, multum semper detrimenti attulisse philosophiæ, nimium novitatis & præjudicia autoritatis evitandi studium, qvo nimirum factum, ut tales homines sibi solis placerent & reliqua inconsulto spernerent omnia, hæc enim res non inutilis quidem, sed nimis prolixa foret: sed vel unico exemplo id demonstrasse sufficiat. Prodeat hic Renatus des Cartes, vulgo Cartesius dictus, vir, ob insignes animi dotes & egregium ingenii acumen, admirandus. Hic si in restauranda veterum philosophia suam collocasset operam, nec nimis novitati studere, omnes aliorum sententias plane exuere & ultra modum dubitare animum induxisset, plus certe momenti & utilitatis ex ipsius philosophia nobis possemus promittere. Verum non poterat aliter fieri, qvam ut falleretur Cartesius, dum omnia præceptorum suorum asserta, & qvæcunque ab iis percepérat, uno nomine contemnebat, & pro erroribus, vanis positionibus, incertis conjecturis &c. habebat: Verba ejus in diss. de Methodo p. 2. seq. hæc sunt: *Ab ineunte etate ad literarum studia animum adjeci, & qvoniā a præceptoribus audiebam, illarum ope certam & evidētē cognitionem eorum omnium, qvæ ad vitam utilia sunt, acquiri posse, incredibili desiderio discendi flagrabit. Sed simulac illud studiorum curri-*

curriculum absolvi, quo decurso mos est in cruditorum numerum  
cooptari, plane aliud cœpi cogitare. Tot enim me dubiis, torgz  
erroribus implicatum esse animadverti, ut omnes descendis conatus  
nihil aliud mibi profuisse judicarem, quam quod ignorantiam mē-  
am magis magisque detexisset. it. p. 6. Quapropter, ubi primum  
mibi licuit per ætatem e præceptorum custodia exire, literarum stu-  
dia prorsus reliqui: captoque consilio nullam imposterum querendi  
scientiam, nisi quam vel in me ipso, vel in vasto mundi volumine  
possim reperire, in sequentes aliquot annos variis peregrinationibus  
impendi. Quid quæso hoc aliud est, quam sibi soli promittere  
omnem sapientiam, reliquos vero singulos ante se in universum  
contemnere, utpote in quibus nihil præter inanis voces reperire  
liceret. Sed si hoc non est audacia, studium contradicendi, phi-  
lautia &c. nescio quid demum. Qvis enim crederet nihil plane  
boni & veri eum hausisse a præceptoribus, quibus, ut ferunt,  
doctissimis semper abundavit? Equidem, ut propositum hoc o-  
mnia spernendi, vel ad minimum de omnibus ultra modum du-  
bitandi legitimum judicarent alii, studium investigandæ veritatis  
& evitandi præconceptas opiniones seu præjudicia autoritatis præ-  
tendebat. Verum quomodo evitaverit ex primo ejus cognoscendi  
principio constat, cum enim semel sibi proposuisset, nihil eorum  
retinere, quæ ab aliis manifeste essent proposita (utut quidam  
afferat, eum plurima hausisse ab aliis, de quo tamen non  
judico vid. *Huetius* in *Cens. philos. Cart.*) neque primum co-  
gnoscendi principium Aristotelicum ipsi placebat, cuius tamen  
manifestam & invictam veritatem nullo negotio potuisset percipi-  
pere, aliud sibi satis absurdum excogitabat principium primum:  
*Cogito, ergo sum.* Non erimus prolixii impræsentiarum in demon-  
stranda falsitate illius principii, cum ab aliis jam sufficienter fa-  
ctum sit. vid. *Philos. Burgund.* Potest autem quivis nullo negotio  
judicare ex defectu requisitorum principii in genere, quod debet  
esse nuda, vera, certa ac unius sensus propositio. Talis autem  
non est, siquidem integrum enthymema exhibet; nec gignit cer-  
tum sensum, quod ex diversis explicationibus autorum constat.  
Præterea ad principium requiritur, ut in Syllogismo locum vel

majoris vel minoris explere possit ad eliciendam propositionem aliam, qvod itidem ad Cartesianum principium non quadrat. Sic infallibile quoque non est, ex qvo tamen imprimis judicare licet principium primum. Demum qvomodo Cartesius se ipsum, & cognitionem sui fundamentum & principium omnium veritatum philosophicarum ponere potest, ubi plane nulla datur conexio. Hoc ergo dixisse hic sufficiat, Cartesium ( in hoc imprimis momento ) magis novitatis qvam veritatis studiosum fuisse, & eo ipso, dum præjudicia autoritatis evitare voluit, in duo alia graviora præjudiciorū genera incidisse. Colligit enim Cartesius ex hoc, quod sensus interdum fallant, eos semper fallere aut fallere posse, quod jamtum supra præjudicium absurdæ ratiocinationis diximus. Qvod autem juxta hoc principium velit, ut aliquis omnia ex animo deleat & pro falsis habeat, qvemadmodum de se ipso dubitare cedit, an corpus manus aut pedes habeat, & ex hoc inferat primum cognoscendi principium adeoque fundamentum omnis cognitionis ac Philosophiæ esse: *cogito, ergo sum*; in hoc non solum idem præjudicii genus jam dictum, sed etiam præjudicium affectuum ( de qvo mox ) incurrit. Vix enim appareret, quid respondere possit Cartesius objicienti: si de omnibus dubitandum & singula ex animo seu falsa delenda, qvidni etiam de hoc, num aliquis cogitet? cum hic major incertitudinis occurrat suspicio. Si ad conscientiam provocare vellet Cartesius, alter reponeret, se jam rejicere conscientiam & eam seu falsam fingere, seu qvod plane talem non habeat. Eodem ergo jure posset aliquis prima cognoscendi principia constituere: *nasum vel crines habeo, ergo sum*.

§. 17. Idem non solum ex aliis Cartesii sententiis, sed & pluribus recentioribus Philosophis demonstrare haud difficile foret, homines nimium aliena aversando & autoritatem fugiendo, s̄epe in longe incidere pejora. Sed instituti nostri ratio aliud requirit. Ut ergo constet, qvo fine hactenus dicta in medium proposita sint, notamus, ad evitanda præjudicia autoritatis facere, ut aliquis in sententiis aliorum dijudicandis & veritate investiganda, non tam attendat, quis aliquid dicat, sed qvomodo & quid dicat. Item neq; ex antiquitate neq; ex novitate, sententiae suffici-

sufficiens produci posse argumentum pro ejus vel veritate vel falsitate demonstranda. Ubi tamen antiquitas in tantum prærogativam habet prænovitatem, in quantum plurimorum consensum presupponit. Nam ab eo, qvod omnibus vel pluribus, vel maxime sapientibus probatur, temere recedendum non est. Et ingens profecto argumentum, si non apodicticum, tamen probabile, pro sententiæ cujusdam veritate desumitur ex consensu plurimorum eruditorum. Quando vero solus consensus rem confidere debet, æque parit præjudicium autoritatis. Nam ubi evidens ratio contrarium svadet, nihil valet autoritas humana, & multitudo errantium non parit errori patrocinium. Cartesius tamen justo latius progredividetur, quando dicit, homines exemplo potius & consuetudine, quam ulla certa cognitione duci, qvod exemplo vestium declarat, ubi, qvod maxime nobis placuit ante decem annos, & forte post decem annos rursus placebit, nunc ridiculum videtur & ineptum. Imo addit, circa ea, qvorum veritas non facile investigatur, nulli rei esse minus credendum, quam multitudini suffragiorum, cum longe verisimilius sit, unum aliquem invenire illa potuisse, quam multos p.10. Disp. de Methodo. Ubi circa prius assertum quidem concedi potest, quandoque illud contingere, sed qvod perpetuum hoc sit & absolute verum, non facile impetrabit ab omnibus, ut credant. Ita nulla apparet ratio, cur posterius assertum mereatur assensum, unum melius, quam multos invenire posse veritatem alicujus rei difficultis, qvoniam hoc potius contra sanam rationem esse videtur. Optimum proinde erit, ut videamus, ne antiqua omnia nimis fordeant, nec brutorum instar ab autoritatibus sine omni ratione trahamur,

§. 18. Consideratis nunc illis, quæ ad intellectum primario spectabant, demum ad affectus pergitus, qui non pauca efficiunt præjudicia. Spectant autem huc imprimis amor, odium, complacencia, philautia illicita, studium contradicendi &c. Et quidem præjudicia amoris & odii imprimis impediunt veritatem, a quibus magni viri saepe immunes non sunt. Manifestum exemplum præjudicij amoris & odii habemus in Cartesio. Heinricus Regius Prof. Ultraj. conscripsérat theses quasdam, in quibus afferebat, hominem esse ens per accidens, & negabat formas substantiales. His absurdis pos-

suti-

sitionibus, Gisbertus Voëtius ( amicus alias Regii, & qui multum pro hoc laboravit, ut Prof. Publ. fieret ) itidem theses disputandas proposuit, in quibus sententias illas examinavit & rejicit. Cum ergo Regius disputare contra Voëtium non auderet, & tacere tamen nollet, scriptum composuit, idque Cartesio transmisit, exquirendo ipsius judicium. Hinc Cartesius, ut sciret sententias illas falsas esse, & exprobraret etiam Regio, ceu imprudenter ab ipso factum, quod homines dixisset ens per accidens, quodque palam edisserueriset, formas substantialias non esse, nihilsecus ex amore erga asseclam ad se confugientem & auxilium implorantem, & in odium adversus doctissimum Voëtium non modo instruxit Regium, quo pacto posset fucum facere, & sententiam suam incrustare, sed & excusavit eundem, & sententias elevavit in peculiari quadam Epistola. Hoc certe nemo unquam dicere poterit studium veritatis, qui præjudiciis affectuum vacuus est. Evidem Gisbertum Voëtium quodque vario modo præjudicii affectuum, imprimis odii & superbiæ reum esse dicunt in ipsis illis controversiis, quas habuit cum Cartesio. Ubi tamen simpliciter pronunciare non possum, an ex odio & superbia, quin potius ex justa indignatione, quod Cartesius tanto fastu omnes veteres contemneret, paulo severius & acrius contra eundem dixerit: liberare autem illum nolo, cum saepè nihius agere & benignior erga Cartesium esse potuerit, quin imo debuerit. Nolumus cumulare hic exempla talium præjudiciorum, cum res ingrata sit, & praxis toto die talia ostendat. Fugienda autem maxime a viro ingenuo & cordato.

§. 19. *Præjudicia complacentiae* illi communiter committunt, qui spurum alterius lambunt, & ideo saltem quædam affirmant vel negant, ut alteri placeant, ejusdemque favorem retinent. Hoc parasitorum genus pessimum inter mortales & orbi erudito maxime exitiosum est, cuius tam fertilis hodie mundus, ut ubique de ejusmodi malorum lerna conquerantur homines. Nihil enim tam bene dici potest, quod talis parasitaster non rodat. Hinc tot libelli famosi, tot injuriosa scripta tabernas librarias replent, ut mens bona & pia eadem horreat. Quot mēstrosa, explosa, absurda, imo nefanda, in publicum non protruduntur dogmata? eo saltem fine ut huic vel isti ægre faciant, licet totus

totus mundus scandalum inde capiat. Qvis nescit condu-  
cta illa mancipia, qvi conyitiis alios proscindunt, & qvicqvid in  
buccam venit in innocentissimos homines expuunt & eructant,  
memores illius: *Calumniare audacter, semper aliquid beret.* Sed  
rædet chartam & calamum hoc impuro hominum genere macula-  
re. Vescantur carduis suis securè, nos nihil turbabimus, sed ad a-  
lia pergendum ducimus.

§. 10. Præjudicia philautie optimis etiam ingenij tam no-  
xia sunt, qvam nulla alia, & nihil magis officit conatibus ad perfe-  
ctionem aliquam contendentibus, qvam nimia confidentia ac cœ-  
cus amor sui. Hoc multi non raro excoecantur, ut adeo mirum  
haud sit, si videre nequeant, qvid desit, qvid superfit; sicqve dum  
plus, qvam par est, sibi tribuunt, seipso decipient, aliisqve ridendi  
materiam suppeditent. Utinam in seipso interdum animadver-  
tisset Cartesius, qvod de aliis præclare & vere dicit: *Permuli-*  
*sunt, qui, cum plus aequo propriis ingenii confidunt, nimis celeri-*  
*ter solent judicare, nunquam satis temporis sibi sumunt ad ratio-*  
*nies omnes circumspiciendas, & idcirco si semel ausint opiniones o-*  
*mnes vulgo receptas in dubium revocare & velut a tritæ via recede-*  
*re, non facile illi semitæ, quæ rectius dicit, semper insistent, sed va-*  
*gi potius & incerti in reliquam vitam aberrabunt.* Disp. de Meth.  
p. 10. Digna sunt verba Platonis, qvæ huc adscribantur: *O-*  
*mniū maximum quoddam malum in multorum hominum animis est*  
*ingenitum, in quo, cum sibi indulgeant, remedium, quo se ab illo li-*  
*berent, expedire nullo modo possunt.* Est autem id, quod dicere so-  
lent, unumquemque sibi natura amicum esse, & recte profecto, si bu-  
jusmodi esset erga se unusquisque; at revera usu venit, ut omnium  
malorum, quibus hominum vita involvitur, nimius sui amor causa  
existat. Is enim, qui amat, circa id, quod amat, sane obcæcatur,  
ac proinde de rebus justis, bonis, honestis male judicat, qvum in ea est  
sententia, ut opinetur majorem sibi, quam veritati honorem tri-  
buendum. Non tamen deceat eum, qui vir magnus sit evasurus, in  
rebus suis acquiescere, sed ea potius complecti, quæ vel apud seipsum,  
vel apud alium quempiam juste fieri videantur. Ex eodem vero  
peccato hoc etiam omnibus contingit, ut quandoque imperitiam suam

D

sapiæ

Sapientiam esse arbitrentur: hinc sit, ut quum nibil (at ita dicam) norimus, omnia tamen nos scire opinemur. Quum vero nos neque aliis permittamus ea agere, que tamen ignoramus, sit ut ipsi illa aggredientes facere, turpiter erremus. Itaque unusquisque a caco illo sui amore aborrere debet, & seipso meliores sequi, ut bujusmodi quidem in re nullam verecundiam praetexat, qua a rebus praeclare agendis impediatur. L. 5. de Legib. Exempla horum præjudiciorum adjicere nolo, cum tot ingeniorum abortus prostent, ex quibus quilibet hunc defectum facile supplere poterit. Quo minus vero decet virum ingenuum, suos tantum ingenii fœtus simiarum instar admirari & amare, reliqua vero alto supercilie spernere; eo magis quilibet laboret, ut hoc summæ vanitatis jugum excutiat, & saniora cogitet. Qvod ipsum melius non præstabit, quam cognitione sui ipsius. Huc enim spectat antiquæ sapientiæ præceptum, γνῶθι σεαυτὸν, qvo jubemur, ut sese quisque cognoscat. Qodo omnibus hominibus, cujuscunq; etiam conditionis sint, summe necessarium jam olim judicarunt Sapientes: τὸ γνῶθι σεαυτὸν, τὸ δέ τὸ φιλόσοφον. ὁ νοῦ δέχηται τὴν πάντας θεῖον Φιλοσοφίαν εὐζωίαν. Nosce te ipsum, mandatum Dei est: principium & finis omnis Philosophia & rectæ vitae. Simplic. in Epicl. c. 29. Quo pacto si quis modestia & assiduo examine suas explorare vires tentabit, longe facilius ad veram perveniet sapientiam, quam stulta illa sui admiratione.

§. 21. *Præjudicia*, quæ ex studio contradicendi oriuntur, sufficienter etiam loquitur praxis. Omnes quidem veritatem clamant, quam pro fine habent, sed si paulo penitus rem inspiciamus, non obscura aderunt signa, eum in finem nova & peculiaria saepe exco-gitari dogmata, ut sciant alii, nos adesse. Arbitrantur quippe ejusmodi lumina, (si Diis placet) sub communiter receptis dogmatibus nomina sua ita non posse inclarescere, quam si aliquid peculiaris & singularis adducant, cum tamen non claros & celebres, sed infames potius ob perversum illud contradicendi studium se reddant. Prodeant h. l. illi, qui ex nefando contradicendi studio ad ipsam summi Numinis existentiam negandam conatus suos & studia adhibent, & contra omne internum cordis dictamen, scelerū vindicem & bonorum

norum remuneratorem & protectorem inficiantur, saltem ut gloriam captent, si rem tam manifestam & claram, omniumque populorum consensu comprobata negent, & quantum ingenio valeant, in hoc abominabili negotio prodant. De quibus plurima prostant scripta, quae adire quivis pro lubitu potest. Quam crasse & impie Dei pariter ac Dæmonum omnium existentiam negent Hobbesius & Spinoza, adeo, ut ex solo contradicendi studio, Scripturæ, rationi & omnibus sensibus bellum indixisse videantur, omniaque aliorum asserta contemnunt & eludant, notissimum est. Vid. de his & aliis *B.D.Nathanaël Falck, in Demonol. recent. autor falsa.* Magnum illum Hugonem Grotium, Virum, ob excellentissimum ingenium & eruditioem summam, admirandum, quo non deduxit contradicendi studium? Certe si insignes ingenii sui vires non tam ad vera dogmata impugnanda, quam defendenda applicuisse, maiores ipsi deberent laudes. Verum quam pessime saepe in ipsam Scripturam S. alienos & incongruos invexerit sensus, solide satis monstravit B.D. Calov. in Bibl. Illustr. Ita nullam aliam comminisci possum causam, cur Cartesius tam vehementissime invehatur in Logicam, omnemque ipsi deneget usum, quam studium contradicendi, siquidem verisimile esse non videtur Cartesium h.l. ita locutum esse, quam judicavit; adsunt enim non pauca, ex quibus apparet, plane aliud ipsi fuisse persuasum. Fortassis tamen hanc ejus sententiam auxit elegantissimarum instantiarum opus a Gassendo conscriptum, in quibus semper cum ejusmodi verbis urget, quæ vim concludendi syllogisticam continent. Et hac ratione duplex affectuum præjudicium commisisset. Nec ipsum Aristotelem ab hoc præjudicio ex studio contradicendi orto absolvere possumus; siquidem in doctrina de summo bono & ideis Platonis saepe præceptorī affingit mentem alienam, ut ut semper affirmet, se nullum alium in refutando Platone habere finem, quam veritatem. Huc spectat etiam vulgus Philologorum seu Philologastri, qui inutiles interdum propter vocem lites movent, quam tamen ipsi recte non intelligunt; nec non qui genium linguæ non satis capientes optimos interpretes inique taxant & reprehendunt. Plura dari affectuum præjudicia non nego, temporis tamen & instituti ratio non permittit, ulterius in ea inquirere,

D 2

nec

nec etiam ipsa res exempla requirit, unde breviores hic, quam in antecedentibus ducere lineas possumus.

§. 22. Non obscurum ex hactenus dictis esse arbitror, quantum damnum studiis afferant præjudicia, & quam difficulter aliquis iisdem ligatus in veritatis investigandæ cursu progredi queat. Nullam ergo in damnis illis prolixe recensendis collocabimus operam, cum quibus, cuius oculi fascinati non sunt, plura eorum videbitur, quam videre desiderat. Brevissimis potius in eo erimus occupati, ut universalem aliquam illis paremus medicinam. Ubi palmarium requisitum est, ut quibus eruditus orbi profuturus pro virili crassæ ignorantiae tenebras dispellere laboret. Cum enim ab ipso summo Numinе naturalis appetitus scientiæ omnibus hominibus inplantatus sit, quod tum universalis experientia, tum communia illa naturalis luminis & rectæ rationis principia testantur, non melius aliquis divino instituto & suo officio satisfacere potest, quam si legitime illa sciendi media adhibeat, & quantum potest turpi ignorantia se liberet. Nam stolidos & superstitiones monachos, fratres ignorantiae dictos, & alios, qui ex malitia & protervia felicitatem in ignorantia quaerunt, non curamus, cum tales hominum nomine indigni sint. Qui enim naturali huic instinctui repugnant, & dum omnes homines natura scire desiderant, dicente Arist. lib. I. metaph. c. I. nihilominus ignorantiam affectant, humanam quasi naturam exuntur. Certe qui summa illa elogia sapientiæ ceti maximi boni, & ignorantia cœu infelicitis mali vituperia ex Salomone sapientissimo paulo penitus considerat, non poterit non desiderio sciendi flagrare & ignorantiam fugere. Quo ipso tamen immoderatum sciendi raptum non probamus, quo acti credenda, imperscrutabilia, inutilia &c. nimis curiose perscrutari, sed frustra, intendunt, eoq; plus danni quam emolumenti sibi attrahunt. Dantur enim multa in scientiæ campo, in quæ per intellectus nostri imbecillitatem penetrare nō possumus. Nec omnia etiam scire conducit, cum quædam satius ignorentur, quam sciantur. De illis ergo monitum hoc intelligi nolim.

§. 23. Ut autem ignorantiae hæc discussio legitime suscipiatur, evitanda maxime pessima singularitas, qua ducti homines, ab aliis semper distingvi volunt, & communia veræ sapientiæ dona fa-

stidi-



stidiunt, & illud solum admirantur ac aestimant quod rarum aut singularare est. Hæc enim unica videtur esse causa, quod, ingenianon spernenda, absurdissimas saepe amplectantur opiniones eò, quod singulares & novæ sint, unde libenter se erroribus & ignorantia implicant. Arcto cognitionis vinculo cum haec singularitate cohæret soli-scientia in §. 20. jam rejecta. Huic enim addicti omnia ex propriis viribas, ex aliis nihil haurire desiderant, quoniam omnes universæ sapientiæ fines ingenii sui terminis conclusos putant. Unde in minimis inventis gloriantur, quæ tamen præstatiora ingenia vix aestimarent. Neque in hoc acquiescant, sed alios communiter contemnunt, & eorum labores deprimunt, quasi cum ejusmodi sciolis & ipsorum asseclis sapientia interitura sit. Quodsi autem ex aliis sua desumant, nolunt tamen tales videri, qui aliorum ope proficerint. Ejusdem comitatis est vana multorum omniscientia, ratione cuius quidam aliorum cedunt vineta, & dum in hoc vel illo studiorum genere excellunt, in omni sapientiæ parte Dictatores esse cipiunt. Alii vero in multis libris, aut historica eorum notitia omniscientiam querunt, & sic non exiguum sibi fingunt eruditionem, cuius tamen ne limen quidem salutarunt. Hæc profecto praet aliis veræ sapientiæ obsunt & præjudicia tot, tamque absurdia gignunt, ut enumeratione indigna ducam. Proscriptis autem his impedimentis, in sapientia comparanda & ignorantia repellenda constantia adhibenda est: sicut enim uno ictu non cadit arbor, ita una aetione neque virtus acquiritur, neque unius vel alterius rei aliquali cognitione vera comparatur scientia. Nec desperandum statim si non ex votis omnia succedunt, sed labori jungenda patientia.

§. 24. Dictis sua constabit veritas, jam de illo disquiritur, quibus mediis aliquis uti debeat ad propellendam ignorantiam & scientiam comparandam, imprimis talem, quæ ab omnibus præjudiciis libera sit. Cartesius consilium tale suppeditat part. 1. princip. phil. §. 1. & 2. p. 1. Quoniam infantes natus sumus & varia de rebus sensibilius judicia prius ruitus, quam integrum nostra rationis usum haberemus, multis præjudiciis a veri cognitione avertimur; quibus non aliter videmur posse liberari, quam si semel in vita de ipsis omnibus studeamus dubitare, in quibus vel minimam incertitudinis suspicione

reperimus. Quin & illa etiam, de quibus dubitavimus, utile erit babe-  
re profalsis, ut tanto clarus quidnam certissimum & cognitu facilli-  
mum sit, inveniamus. Hic equidem nulli negamus, dubitationem,  
non omnem quidem, sed circumspectam & genuinam (quæ fluctua-  
tio animi est, ex re incerta & obscura orta, adeoq; assensus vel dissen-  
sus suspensio) omnibus in Philosophia excolenda occupatis maxime  
esse commendandam, utpote qua id effecerint, ut præcipitantiam &  
festinationem in judicando noxiā vitent, & libertate sentiendi a  
Deo sibi concessa legitime utantur. Et hæc dubitandi ratio non Car-  
tesio demum debet originem, sed a veteribus Philosophis, Socrate,  
Platone, Aristotele, Cicerone, aliisq; pro non spernendo veritatem  
inquirendi medio fuit habita; quod prolixè demonstrare possemus,  
si institutum nostrum permitteret. Verum hæc dubitatio a veteribus  
satis coarctata, post nimis fuit extensa & majorem peperit abusum,  
quam usum. Unde universalem illam dubitationem, quam Cartesius  
præscribit, nemo nisi cum summo studiorum detimento approba-  
re potest. Imprimis quando cum hac dubitatione conjungit, ut o-  
mnia ex animo deleantur & pro falsis habeantur, unde aliquot an-  
nos huic dubitationi se impendisse scribit Diff. de Meth. Cur enim  
illa pro falsis haberem, quæ notissima sunt, vel quorum notitia mul-  
to labore comparata? Ut autem brevissimis pateat, quid de dubita-  
tione illa habendum sit, & quantum ad evitanda præjudicia faciat,  
(a) ipsum dubitationis *objectum* distingendum est. Quod si er-  
go sub *objecto* dubitationis Deus, res divinæ, & mysteria simul  
comprehendantur, non dubitamus asserere illam dubitationem  
ad minimum periculosam & Christiano homini minus con-  
venientem esse. Deinde cognoscenda se nobis offerunt vel  
certissima, & nulla difficultate laborantia, vel incerta, obscura &  
difficilia. De posterioribus omnino non solum concedenda dubita-  
tio, sed summe etiam utilis, imo necessaria est, ut quis judicium su-  
um tamdiu suspendat, donec probe consideratis rationibus pro  
utraque sententia, demum appareat, quænam verior aut probabi-  
lior existat. De prioribus vero, qualia sunt principia nobis con-  
nata & congenita, quorum veritas tam clara & perspicua est, ut ex  
ipsa simplicium terminorum apprehensione & cognitione statim  
appa-

appareat, dubitare velle, non adeo congruum, sed inconstan-  
tiam arguere videtur. Aliqualem tamen subdubitatem,,  
quæ in examinandis aliorum sententiis in primis suboritur, cir-  
ca omnes veritates & objecta locum habere posse, non nimis  
negarem: quamvis hæc nomen dubitationis apud omnes for-  
san non obtinet. (3) De *Subjecto* dubitationis notandum,  
non omnibus promiscue concedendam eam esse, sed illis  
salem, qui maturo & confirmato judicio, debita eruditione, aliis-  
que mediis ad veritatem investigandam necessariis prædicti sunt.  
Alias, si discentes de omnibus præceptorum assertis dubitare præ-  
sumerent, nullam majorem studiorum cursui injicere possent mo-  
ram. Sic enim nihil scirent, neque discerent, sed *avnoδιδακτοι* in-  
felicissimi ignorantiae tenebris se involverent, variaque incurre-  
rent præjudicia, quæ tamen fuissent evitanda. Quod (y) ad *tem-*  
*pus* attinet, dubitatio non debet esse perpetua, seu, propterea non,  
est dubitandum, ut in dubitatione & incertitudine subsistamus,  
quod fecerunt olim Sceptici, qui ita dubitabant, ut nihil plane asse-  
rerent, & de omnibus rebus pronunciarent: *non magis est, quam*  
*non est*; sed potius ut veritatem percipiamus & certi aliquid post  
dubitatem ex argumentorum & rationum pondere afferamus.  
Hæc siugula circa dubitationem probe si observentur, facile admit-  
to illam magnum momentum esse ad evitanda præjudicia.

§. 25. Alii optimam viam ad veritatem & præjudicia fugienda  
allegant libertatem philosophandi. Verum & hæc certis circumscri-  
benda limitibus est, ne in effrenem sentiendi de omnibus pro lubitu  
licentiam abeat. Nemini quidem autor esse possum, ut omnem suam  
doctrinam (in philosophicis imprimis) in unius hominis autorita-  
te resolvat, & ab uno expectet, quod ab omnibus præstari vix potest.  
Interim probe observandum, ne nimis illa extendatur libertas, nec  
omnibus aut omni tempore concedatur. Fuerunt quippe, & forsitan  
adhuc sunt, qui libertatem philosophandi ita explicant & extendunt,  
ut in fidem etiam & res Theologicas grassari, & harum fundamenta  
evertere audeant; cuius pessimæ libertatis philosophandi plura pro-  
stant exempla quam optamus. Sed hoc plane inconveniens est.  
Pariter nec sub prætextu hujus libertatis honestissima instituta vio-  
lenta

Ianda sunt, in quorum labefactatione salus saepe reipublicæ pericitatur. Sic qui ad id exposceret libertatem philosophandi, ut errores suos protrudat in publicum, libidinem cavillandi & fugillandi optime de re literaria meritos viros expleat, omnia bene dicta & haec tenus recepta dogmata nondum labefactata imprudenter ex scholis eliminare & sub jugi prementis specie excutere labore; ille eadem se defendere haud potest. Neque hoc conduceret, morem in quibusdam Academiis prudenter receptum, quo dux aliquis ex veteribus Philosophis eligitur, cujus vestigiis potissimum docentes insistant, imprudenter immutare. Non enim eo fine hoc factum est, ut juramenti fide ad eum adstricti sint, & ne latum ungvem ab eius sententiis recedere queant, sed ut salva circumspecta philosophandi libertate, viae saltem praeccludantur, scepticismo & intempestivo ac temerario novitatis ac singularitatis studio. Ex his autem sponte fluit, ante debitos annos, matrum judicium, & sufficientes vires nemini hanc libertatem concedendam esse: secus enim barbaries, ignorantia, aliaque absurdâ facillime introducerentur. Tamdiu enim praecceptores adhibendi, donec aliquis proprio studio verum a falso discernere aptus est. Cetera, quae huc spectant, ex supra dictis possunt esse manifesta.

§. 26. Tandem hoc necessarium veritatis consequendæ, & prejudicia fugiendi monitum adjicimus, ut quis de legitimo primo cognoscendi principio sollicitus sit. Hoc enim falso, cui tamen ceu fundamento omnis sapientia philosophica inniti debet, certe omnia eidem superstructa facile corruerent. De Cartesiano superius dictum fuit. De aliis prolixe h. l. differere, eademque itidem rejicere, nostri jam laboris non est, nec charta permittit. Illud dixisse sufficiat, Aristotelico cognoscendi principio primo: *Impossibile est idem simul esse & non esse*, melius haud inveniri: Stat enim contra omnium, quotquot illud labefactare aggressi sunt, conatus adhuc inconcussum. De cuius veritate, primitate &c. vid. B. Donati in Doctr. Reg. Proœm.

pag. 8. seqq. Nos filum hic abrumpimus, reliqua benevolo Lectori expendenda relinquentes.

S. D. G.



01 A 6541

f



3

IA → OL

kor  
vD 17



# Farbkarte #13

B.I.G.

Blue Cyan Green Yellow Red Magenta White 3/Color Black

8  
7  
6  
5  
4  
3  
2  
1  
Inches  
Centimetres  
1 2 3 4 5 6 7 8 9 10 11 12 13 14 15 16 17 18 19

B.I.V.  
E  
IDICII,  
Sub  
ESIDIO  
Æ Eöpffers /  
PHIL. ADJ.  
ce differet  
US ANDREÆ,  
ala-Saxo,  
torio Majori,  
4. Mart. 1696.  
H. C.  
MEM BERGAE.  
NI SCHRÖDTERI, ACAD. Tyr.

St. 21